

S A M Þ Y K K T

um breyting á samþykkt fyrir Sparisjóð Kópavogs nr. 170 9. október 1959.

1. gr.

1. ml. 2. mgr. 14. gr. orðist svo:

Vextir af innstæðu skulu reiknaðir út að fullu og færðir í bækur sjóðsins eigi sjaldnar en einu sinni á ári og ávallt í lok hvers árs.

2. gr.

Framanrituð samþykkt staðfestist hér með og öðlast þegar gildi.

Viðskiptaráðuneytið, 23. júní 1981.

F. h. r.

Þórhallur Ásgeirsson.

Björn Lindal.

25. apríl 1981.

Nr. 311.

R E G L U G E R Ð

um Íþróttakennaraskóla Íslands.

I. KAFLI

Hlutverk og réttindi.

1. gr.

Kennslan í skólanum skal miðuð við að nemendur hljóti ákveðna undirstöðumennntun svo þeir geti síðar tekið að sér kennslustörf í skólum í íþróttum, slysaþjálf og líkams- og heilsufræði.

Skólinn skal veita nemendum kennslu í íþróttum og félagsstörfum svo að þeir geti leiðbeint í þessum greinum utan skólanna, þ. e. a. s. hjá íþrótt- og ungmennafélögum og starfshópum fyrirtækja.

Í samráði við menntamálaráðuneytið og Íþróttakennarafélag Íslands skal skólinn efna til námskeiða fyrir íþróttakennara. Einnig skal hann efna til námskeiða fyrir leiðbeinendur í íþróttum, þegar fé hefur verið veitt til þeirra. Skal þar bæði vera um að ræða byrjendanámskeið og framhaldsnámskeið. Að námskeiðum þessum skal unnið í samráði við Íþróttasamband Íslands og Ungmennafélag Íslands.

2. gr.

Próf frá Íþróttakennaraskóla Íslands veitir réttindi samkvæmt lögum nr. 51/1978 um embættisgengi kennara og skólastjóra. Einnig veitir próf frá skólanum réttindi til kennslu í slysaþjálf og líkams- og heilsufræði á skyldunámsstigi.

Íþróttakennarar, sem lokið hafa námi í Íþróttakennaraskóla Íslands og fullnægja inntökuskilyrðum Kennaraháskóla Íslands, eiga rétt á námi í Kennaraháskóla Íslands. Um þetta nám skal sett reglugerð, sem byggð er á samkomulagi milli Kennaraháskóla Íslands og Íþróttakennaraskóla Íslands og staðfest af menntamálaráðuneytinu.

3. gr.

Námstími skólans er tvö ár. Hvort skólaár skal skóli starfa í 8½ mánuð, þ. e. a. s. frá 15. sept. eða 1. okt. til 1. júní eða 15. júní. Náminu skal skipt í tvær námsannir hvort skólaár, haustönn og vetrarönn auk styttri vorannar.

Að sumrinu á milli hinna tveggja námsvetra, skulu nemendur kenna íþróttir í a. m. k. 70 kennslustundir hjá íþrótt- eða ungmennafélögum, starfshópum eða skólum. Nemendum er frjálst að ráða sig til starfa þar sem þeir kjósa helst að vinna við íþróttakennsluna. Óski nemandi eftir aðstoð skólans við leit að vinnu, skal skólinn í samráði við félagasamtök íþróttamanna eða skóla, leitast við að finna starf fyrir nemandann.

Skólinn lætur útbúa sérstakt eyðublað, sem afhenda skal forstöðumanni námskeiðs eða formanni félags þess, sem nemandinn starfar hjá. Hann útfyllir síðan eyðublaðið og greinir frá frammistöðu nemandans og gefur upp kennslustunda-fjölda og sendir til skólans.

II. KAFLI**Inntökuskilyrði, námsgreinar, próf.****4. gr.**

Nemendur, sem innritast í skólann, skulu vera heilbrigðir að dómi læknis og vel hæfir til íþróttaiðkana. Nemendur skulu vera reglusamir og hafa lagt stund á íþróttir með góðum árangri. Nöfn tveggja manna, annar þarf að vera íþróttakennari, er leita má til um upplýsingar, þurfa að fylgja umsókn um skólavist.

Nemandi skal eigi vera yngri en 18 ára á því ári, sem hann hefur nám og eigi eldri en 26 ára. Skólaráð getur veitt undanþágu frá hámarksaldri ef sérstakar ástæður eru fyrir hendi.

5. gr.

Umsókn um skólavist skal senda til skólastjóra en skólaráð eða skólastjóri í umboði þess, tekur lokaákvörðun um umsóknir. Skólaráð setur ákveðinn umsókn-arfrest.

Undirbúningsmenntun nemenda skal vera sem hér segir:

- a) stúdentspróf eða
- b) kennarapróf eða
- c) tveggja ára framhaldsnám að loknum grunnskóla með fullgildu prófi.

Annað undirbúningsnám veitir rétt til inngöngu í skólann sé það eigi metið minna en að framan greinir. Heimilt er að taka tillit til reglubundinnar þátttöku í íþróttum og félagsstörfum, tengdum íþróttum og æskulýðsstörfum. Skólaráð þarf að meta og mæla með slíkri umsókn og skólanefnd að samþykka hana.

Sæki fleiri um skólavist en hægt er að taka í skólann gildir mat prófa, starfs-reynsla, færni í íþróttum, þátttaka í félagsstörfum, aldur og umsagnir kunnugra manna. Leiki vafi á um hæfni umsækjenda er heimilt að efna til sérstaks hæfnis-prófs meðal umsækjenda, þar sem hæfni þeirra til náms í íþróttakennarskóla er metin.

Til þess að hljóta inngöngu á íþróttanámskeið fyrir leiðbeinendur í félögum, skal þátttakandi hafa náð 18 ára aldri. Hann þarf að búa yfir góðri hæfni í íþróttum og hafa meðmæli stjórnar þess félags, sem hann er skráður félagi í.

6. gr.

Námsefni skólans skal skipt niður í kjarna, kjörsvið og valgreinar.

Kjarni nefnist það námsefni, sem sameiginlegt er öllum nemendum skólans.

Kjörsvið er það námsefni, sem nemendur með þá menntun, sem metin er gild til náms í Kennaraháskóla Íslands, geta valið sér í þeim tilgangi að undirbúa og stytta nám í Kennaraháskóla Íslands svo þeir geti, að afloknu námi, hlotið réttindi til kennslu bóklegra greina. Kjörsvið komi til framkvæmda, eftir samþykkt reglugerðar um þetta nám.

Valgrein telst hver sú sérgrein í íþróttum sem kennd er við skólann og nemendur velja sér. Með náminu í valgrein á nemandinn að leitast við að auka þekkingu sína og hæfni í greininni með þjálfun og markvissu námi. Að valgrein skal unnið síðara ár nemendanna í skólanum. Valgrein skal aðeins vera ein og þarf nemandi að geta unnið að henni sjálfstætt á námstímanum. Kennarar eru nemendum til aðstoðar.

7. gr.

Í sérstakri námskrá skal gerð grein fyrir námsgreinum þeim, sem kenndar verða við skólann, svo og áætluðum kennslustundafjölda í hverri grein og lengd námsins. Heimilt er að fjölga eða fækka kennslugreinum. Skal skólaráð leita samþykkis menntamálaráðuneytisins fyrir slíkri breytingu. Leita skal staðfestingar menntamálaráðuneytis á námsskrá.

Fjalla skal um það efni á námskeiðum, sem ekki er hægt að skipa eðlilega á samfellda stundaskrá annar- eða vetrarlangt.

Námsefni á námskeiðum fyrir leiðbeinendur ákveður skólanefnd í samráði við aðila, en námsefni á námskeiði fyrir íþróttakennara ákveður skólanefnd í samráði við Íþróttakennarafélag Íslands.

8. gr.

Próf skulu fara fram í lok hvors skólaárs. Skólaráði er heimilt að ákveða próf í lok annar eða á öðrum tíma, ef þannig stendur á námi. Til að fá að ganga undir próf í ákveðinni námsgrein við skólann, þarf nemandi að hafa sótt allar kennslustundir í námsgreininni og sótt skólann reglulega nema um eðlileg forföll hafi verið að ræða.

9. gr.

Kennarar prófa hver í sinni grein. Við áfangapróf, annarpróf og millibekkja-próf getur skólástjóri skipað prófdómara úr hópi kennara.

Við lokapróf skal vera prófdómari skipaður af menntamálaráðuneytinu að fengnum tillögum skólaráðs. Öll prófgögn nemenda, er þeir hafa unnið og hafa áhrif á lokaeinkunn þeirra, skulu vera hinum stjórnskipuðu prófdómurum til reiðu. Prófverkefni skulu háð sambykki prófdómara. Við lokapróf dæma hlutaðeigandi kennari og prófdómari um frammistöðu nemenda. Verði þeir ekki sammála um einkunn skal taka meðaltal einkunna kennara og prófdómara.

10. gr.

Námi lýkur með prófi eða öðru námsmati. Miða skal próf við námstilhögun og kröfur í hverri grein. Heimilt er að halda lokapróf í hluta af grein, er kennslu í afmörkuðum þætti námsefnis lýkur (áfangapróf) og skal þá einkunn á því prófi reiknast sem hluti af lokaeinkunn í greininni.

Við áfangapróf skal þess gætt eins og unnt er að rétt vægi sé milli námsáfanga við heildar einkunnagjöf í námsgreininni. Vægi einkunnar á áfangaprófi skal ákveða fyrirfram. Þegar vægi námsþáttar er reiknað skal miða við magn námsefnis og kennslustundafjölda í námsgreininni.

11. gr.

Prófi skal ætla sérstakan prófdag. Þegar prófað er skriflega eða munnlega í áfanga námsefnis, skal ekki veita sérstakan undirbúningsdag fyrir prófið. Sé hins vegar um að ræða lokapróf í grein, þar sem áfangapróf gilda ekki sem hluti prófsins og námsefnið er tveggja anna nám eða meira er heimilt að veita einn undirbúningsdag fyrir prófið.

Geti nemandi ekki þreytt próf vegna veikinda eða annarra gildra forfalla, getur skólaráð leyft honum að ljúka prófi þegar endurtekningarpróf fara fram.

12. gr.

Í byrjun kennslu hvernar námsgreinar skal útskýra fyrir nemendum fyrirkomu-lag kennslunnar og námsefnið, sem ætlunin er að kenna og prófa í. Þá skal í upp-hafi gera nemendum grein fyrir hvernig háttað verði einkunnargjöf í hverri grein.

13. gr.

Við próf má nota þau gögn ein, er prófdómari leyfir. Nemendur, sem staðnir eru að því að nota óleyfileg gögn eða veita eða þiggja hjálp við próf, hafa fyrirgert rétti til frekari þátttöku í prófi í greininni á námsárinu. Tilkynna skal nemendum þetta ákvæði, áður en skrifleg próf hefjast.

14. gr.

Þegar lokið er við að meta próf til einkunnar, skal kennari afhenda skólastjóra einkunnirnar. Skólastjóri birtir nemendum einkunnir í námsgreininni.

Verkefni nemenda og úrlausnir á prófum eru eign skólans. Skylt er að geyma öll prófgögn eigi skemur en eitt ár.

15. gr.

Próf skulu vera skrifleg, munnleg eða verkleg, eftir því hver námsgreinin er. Gefa skal eina einkunn í hverri grein.

Í stað eins ákveðins prófs í kennslu íþróttar, getur skólaráð, að höfðu samráði við menntamálaráðuneytið, ákveðið að hver æfingakennari gefi einkunn, sem byggð er á frammistöðu nemandans yfir veturinn. Á prófskírteini skal geta einkunnar eða umsagnar í hverri grein íþróttakennslunnar. Meðaltal þessara einkunna skal vera prófseinkunn nemandans í kennslu íþróttar.

16. gr.

Einkunnir skal gefa í hverri grein í tölum 0—10 í heilum og hálfum bilum. Aðaleinkunn reiknast með tveimur aukastöfum:

9—10 er ágætiseinkunn, 7.25—8.99 er fyrsta einkunn

6.00—7.24 er önnur einkunn, 5.00—5.99 er þriðja einkunn.

Til þess að standast próf má aðaleinkunn eigi vera lægri en 5.00 og í engri námsgrein lægri einkunn en 4.00. Í sálarfræði, uppeldis- og kennslufræði, heilsufræði og slysaþjálf, kennslu, sundi og leikfimi skal einkunn þó ekki vera lægri en 5.0.

Ef nemandi fær í einkunn 0.0 í einni grein á áfanga- eða hluta úr áfangaprófi millibekkja- eða lokaprófi, telst hann fallinn á prófinu og á þá ekki rétt til að endur-taka próf á því ári.

17. gr.

Í leikfimi og sundi skal lokapróf samsett af getu, leikni og fræðilegri þekkingu og reiknast hver þessara þátta sem 1/3 hluti af loka-einkunninni. Í öðrum greinum íþróttar, sem prófað er í gildir verklegi þátturinn helming á móti fræðilegri þekkingu.

Í sundi þarf nemandi auk þess að leysa af hendi á tilsettum tíma, sérstakt getu-
próf í björgunarsundi. Þar verður hann að synda 100 metra marvaðasund með mann
svipaðrar þyngdar og ennfremur verður hann að synda alklæddur 25 metra, synda
síðan marvaðasund með mann svipaðrar þyngdar alklæddan 50 metra og afklæðast
á sundi.

18. gr.

Nemandi verður að skila á tilsettum tíma verkefnum þeim, sem skólinn felur
honum að vinna sem hluta af náminu. Þá ber nemanda að taka þátt í námskeiðum,
sem skólinn heldur fyrir nemendur og sækja skóla reglulega allt námstímabilið.

19. gr.

Ef nemandi nær tilskilinni aðaleinkunn á millibekkja- eða lokaprófi en stenst
ekki próf í einstökum greinum eða lýkur ekki námskeiði eða verkefni er honum
heimilt að endurtaka próf og ljúka öðru því, sem vanlokið var þegar skóla lauk,
innan ákveðins tíma, brjóti það ekki að öðru leyti gegn ákvæðum um próf.

Nái nemandi ekki lágmarkseinkunn á fyrra annar- eða áfangaprófi vetrarins,
skal veita nemanda tækifæri til að fullnægja lágmarkskröfum með því að bæta sig
svo í greininni, að meðaltal næstu annar- eða áfangaeinkunnar og hinnar fyrri nái
lágmarki. Nái hann hins vegar ekki lágmarkseinkunn, verður hann að endurtaka
próf í öllu námsefni vetrarins.

Hljóti nemandi einkunn undir lágmarki í fleiri en þremur greinum á millibekkja-
eða lokaprófi, telst hann fallinn á prófinu og á þá ekki rétt á að endurtaka próf.

20. gr.

Endurtekningarpróf er aðeins lefvt einu sinni. Endurtekningarpróf svo og
siúkrapróf, skal fara fram eftir að skóla lýkur að vorinu en áður en skólastarf hefst
að hausti. Nemandi fær ekki að hefja nám á seinna ári nema því aðeins að hann hafi
staðist öll próf, lokið verkefnum og lokið við að kenna íþróttir í a. m. k. 70 kennslu-
stundir um sumarið.

Áfangapróf eða lokapróf, sem tekið er á fyrra ári, gildir sem millibekkja-
próf og er því háð sömu ákvæðum og þar gilda.

Nemendur, sem ekki hafa lokið prófum með tilskilinni lágmarkseinkunn, eiga
rétt á að fá að vita um einkunnir sínar fyrir skólaslit.

21. gr.

Valgreinar skal getið sérstaklega á prófskírteini. Einkunn skal gefa fyrir val-
greinina, sem hó reiknast ekki til aðaleinkunnar. Til þess að standast próf má
einkunn í valgrein eigi vera lægri en 5.0.

Nemendur semja ritgerð um valgrein sína. Ritgerðin skal byggð á faglegum
grunni. líffræðilegum og kennslufræðilegum lögmálum, sem gilda um greinina. Rit-
gerðin skal eigi vera styttri en 2500 orð. Hún skal afhent eigi síðar en 1. apríl og er
hún eign skólans.

Nemendur skulu hafa valið sér valgrein í samráði við kennara áður en þeir fara
í sumarleyfi.

Kennarar meta ritgerð til einkunnar. Heimilt er kennara að óska eftir að nemandi
svari munnlega spurningum, sem snerta valgreinina og útskýri nánar ýmsa þætti
ritgerðarinnar.

Gefa skal nemanda sérstaka einkunn eða umsögn í kjörgrein á kjörsviði sem þó
reiknast ekki til aðaleinkunnar en hefur gildi fyrir framhaldsnám í Kennaraháskóla
Íslands. Geta skal þessa vitnisburðar á prófskírteini.

22. gr.

Námsgreina, sem ekki eru það viðamiklar að ástæða sé til að prófa í þeim eða erfitt er að koma við sérstöku prófi, skal samt getið á prófskírteini.

23. gr.

Við lok námskeiðs fyrir leiðbeinendur skal þeytt próf eða gefin umsögn. Próf-dómari skal skipaður af viðkomandi sársambandi með samþykki skólastjóra Íþróttakennaraskóla Íslands.

III. KAFLI**Um nemendur skólans.****24. gr.**

Nemendur skulu temja sér þrúðmannlega framkomu, reglusemi í skóla og utan hans. Þeir skulu sýna hæversku í samskiptum við skólafélaga sína og kennara og rækja nám sitt af alúð og kostgæfni.

25. gr.

Nemendum eru heimil húsakynni skólans til félagsstarfa eftir nánari ákvörðun skólastjóra, enda gæti þeir reglu og háttþrýði.

26. gr.

Nemendur, sem ekki geta sótt skólann sökum veikinda eða annarra gildra ástæðna, skulu tilkynna skólastjóra forföll. Skólahjúkrunarkona fylgist með líðan nemenda og kveður til skólalækni, telji hún ástæðu til þess. Sé um alvarleg veikindi eða slys að ræða eða önnur gild forföll frá námi um lengri tíma, metur skólaráð hvað nemandi hafi misst mikið úr námi, bóklegu eða verklegu og hvort hann eigi rétt á að ganga undir próf í námsgrein eða greinum á skólaárinu.

27. gr.

Valdi nemandi skemmdum á eignum skólans, ber honum að bæta þær að fullu. Þyki fullvíst að skemmdir hafi orðið af völdum nemenda skólans, og gangist enginn við þeim skulu nemendur skólans bæta tjónið sameiginlega.

28. gr.

Nemendur skulu sjá um herbergi sín og halda þeim hreinum. Þeir forðist háreysti í húsakynnum skólans. Nemendur hafa umsjón með höndum í skóla og heimavistum, eftir nánari ákvörðun skólastjóra og undir yfirumsjón hans. Skólastjóri og kennarar í umboði hans, hafa umsjón og eftirlit í skóla og heimavistum.

IV. KAFLI**Um aga og reglu.****29. gr.**

Agi í skólanum skal miða að því að friða starf hans og temja nemendum stjórnssemi, iðjusemi, hófsemd og þrúðmennsku. Kennarar og nemendur skulu leitast við í sameiningu að glæða heilbrigðan anda í skólanum.

Sýni nemandi vanrækslu við störf og nám, veitir skólastjóri honum áminningu. Sé um alvarlegt brot að ræða eða ítrekað brot, fjallar skólaráð um málið og getur vikið nemanda úr skóla.

30. gr.

Nemendum er skylt að virða reglur annarra skóla á staðnum. Verði misbrestur á, áminnir skólastjóri nemanda, en sé um ítrekað brot að ræða eða alvarlegt brot, fjallar skólaráð um það og getur vikið nemanda úr skóla.

31. gr.

Sé nemandi haldinn næmum smitandi sjúkdómi, er hættulegur getur talist, að dómi læknis, ber nemanda að hætta í skólanum. Sé nemandi haldinn skapbresti, sem gerir hann óhæfan í skólanum að dómi geðlæknis og kennara skal skólaráð víkja nemandanum úr skóla.

32. gr.

Í skóla og heimavistum er öllum óheimilt að hafa um hönd tóbak, fíkniefni og áfengi. Nemendum er óheimilt að nota tóbak og fíkniefni og neyta áfengra drykkja á starfstíma skólans. Verði nemandi uppvís að broti á ákvæðinu um bindindi á tóbak, fíkniefni eða áfengi fjallar skólaráð um málið og getur vikið nemanda úr skólanum.

33. gr.

Gerist nemandi brotlegur við almennt velsæmi og landslög getur skólaráð vikið nemanda úr skóla og meinað honum að ganga undir íþróttakennarapróf við skólann.

34. gr.

Óski nemandi, sem vikið hefur verið úr skóla, eftir að ganga undir íþróttakennarapróf utanskóla eða setjast í skóla á ný, þarf að sækja um það til skólaráðs, sem safnar gögnum og fjallar síðan um málið. Skólaráð metur umsóknina og ákveður hvort gefa skuli brottviknum nemanda tækifæri til að þreyta íþróttakennarapróf við skólann eða setjast í skólann á ný.

35. gr.

Væntanlegum nemendum skulu kynntar helstu reglur skólans, þar á meðal reglur um bindindi, jafnskjótt og þeim er veitt skólavist. Nemendur skulu samþykkja reglurnar og staðfesta með undirskrift, þiggi þeir skólavistina.

V. KAFLI

Stjórn og starfsmenn skólans.

36. gr.

Menntamálaráðuneytið fer með yfirstjórn skólans.

37. gr.

Skólastjóra til aðstoðar við stjórn og rekstur skólans er skólaráð og skólanefnd.

38. gr.

Í skólaráði eiga sæti: skólastjóri, fastráðnir kennarar, einn fulltrúi lausráðinna kennara og tveir fulltrúar nemenda.

Skólastjóri er formaður skólaráðs og kveður skólaráð til fundar a. m. k. einu sinni í mánuði á starfstíma skólans eða oftár, ef þriðjungur skólaráðsmanna óskar þess.

Kjörtímabil skólaráðs er eitt ár. Undir skólaráð heyra öll innri mál skólans, inntaka nemenda, rekstur skólans og stjórn. Þannig ræðir skólaráð aðbúnað skólans, húsakynni hans og tækjakost, fyrirkomulag kennslunnar og námsefni, framkvæmd prófa, árangur nemenda í náminu, framkomu þeirra og annað, það sem lög og reglugerð þessi felur því. Skólaráð getur falið skólastjóra eða ákveðnum hópi skólaráðsmanna sérstök verk skólaráðs. Afl atkvæða ræður úrslitum mála. Falli atkvæði jöfn, ræður atkvæði skólastjóra.

39. gr.

Í skólanefnd eiga sæti: íþróttafulltrúi ríkisins, einn tilnefndur af Íþróttasambandi Íslands, einn tilnefndur af Ungmennafélagi Íslands, einn tilnefndur af Íþróttakennarafélagi Íslands og einn fulltrúi tilnefndur af nemendum skólans. Skólastjóri á sæti á fundum skólanefndar með málfrelsi og tillögurétti.

Íþróttafulltrúi ríkisins er formaður skólanefndar og kveður skólanefnd til funda eftir þörfum og eigi sjaldnar en ársfjórðungslega. Kjörtímabil skólanefndar er þrjú ár, nema nemanda eitt ár.

Undir skólanefnd heyra fyrst og fremst þau mál, er snerta starfsemi skólans út á við. Þannig fjallar skólanefnd um fiárhagslega afkomu skólans, aðbúnað hans í húsakynnum og íþróttamannvirkjum. Tengsl skólans við íþróttakennara og íþróttahreyfinguna, um ráðningu kennara og önnur málefni, sem skólanefnd eru sérstaklega falin í lögum og reglugerð þessari.

40. gr.

Fastir starfsmenn skólans eru embættismenn ríkisins. Skólastjóri er skipaður af forseta Íslands en fastráðnir kennarar og aðrir fastráðnir starfsmenn skulu skipaðir af ráðherra, en áður skal leitað umsagnar skólaráðs og skólanefndar.

Til að vera skipaður kennari við skólann skal umsækjandi hafa lokið prófi frá viðurkenndum íþróttakennaraskóla að viðbættu framhaldsnámi í sérgrein sem menntamálaráðuneytið metur gilt.

Lögð skal áhersla á, að ráða að skólanum kennara, sem hafa sérhæft sig til kennslu ákveðinna íþróttagreina.

41. gr.

Kennaralið skólans skal vera það fjölmennt, að skólinn geti annast þá kennslu íþróttakennaraefna, sem nauðsynleg er talin hverju sinni og lög mæla fyrir um og reglugerð gerir ráð fyrir. Að auki skal skólinn, með starfsliði sínu, annast alla íþróttakennslu í öðrum opinberum skólum á Laugarvatni. Gert er ráð fyrir að í þeirri kennslu fái nemendur íþróttakennaraskóla Íslands æfingakennslu sína undir handleiðslu viðkomandi kennara.

Stundakennara ræður skólastjóri í samráði við menntamálaráðuneytið svo og annað lausráðið starfsfólk.

42. gr.

Að skólanum skal ráða starfsmann sem hefur umsjón með eignum skólans og sér um viðhald á þeim. Hann sér um hús skólans og íþróttamannvirki, böð og ræstingu húsa að vetrinum og íþróttavelli og lóðir skólans að sumrinu. Starfsmaðurinn tekur laun sín úr ríkissjóði.

Heimilt er að ráða að skólanum ráðskonu. Hún hefur umsjón með mótuneyti nemenda og tekur laun sín úr ríkissjóði.

43. gr.

Um launakjör starfsmanna skólans, skólastjóra, kennara og annarra, fer samkvæmt kjarasamningum opinberra starfsmanna. Um kennsluskyldu kennara fer samkvæmt ákvæðum í kjarasamningum opinberra starfsmanna en menntamálaráðuneytið ákveður kennsluskyldu skólastjóra.

Laun námskeiðskennara skulu vera þau sömu og gilda um stundakennslu. Greiða skal þeim ferða- og dvalarkostnað samkvæmt gildandi reglum ríkisins.

44. gr.

Skólastjóra er heimilt, að fengnu samþykki ráðuneytis, að kveðja kennara sér til aðstoðar við eftirlit og umsjón í skólanum og heimavistum. Fyrir slíka vinnu skal greitt samkvæmt gildandi kaaptaxta. Ennfremur skulu kennarar, að fengnu samþykki ráðuneytis, sé þess óskað, starfa með nemendum utan kennslustunda við að undirbúa kennslu og annað nám eftir nánara samkomulagi kennara, nemenda og skólastjóra. Fyrir slík störf má greiða sérstaklega eða fækka kennslustundum kennara.

45. gr.

Eftir að kennari hefur starfað í 10 ár við skólann er menntamálaráðuneytinu heimilt að veita honum ársorlof á fullum launum til þess að auka þekkingu sína og kennarahæfni. Umsókn um orlof skal senda menntamálaráðuneytinu ásamt greinargerð um hvernig kennari hyggst verja orlofinu. Beiðni um orlof þarf að berast ráðuneytinu með árs fyrirvara. Þess skal gætt að orlof kennara torveldi ekki störf skólans.

VI. KAFLI

Ýmis ákvæði.

46. gr.

Aðsetur skólans skal vera á Laugarvatni. Ýmsir þættir í starfi hans geta þó farið fram utan Laugarvatns. Má þar til nefna námskeið, æfingakennslu, kynnisferðir og ferðir til þess að fylgjast með íþróttaviðburðum.

Í fjárveitingu til skólans skal stefnt að því að skólinn taki þátt í ferðakostnaði nemenda, sem af slíkum ferðum leiðir. Nemendur greiða dvalarkostnað sinn, auk hluta ferðakostnaðar.

Á sama hátt geta námskeið fyrir íþróttakennara og leiðbeinendur farið fram annars staðar en á Laugarvatni, eftir nánari ákvörðun skólastjóra og skólanefndar.

VII. KAFLI

Um gildistöku reglugerðarinnar.

47. gr.

Reglugerð þessi er sett samkvæmt lögum nr. 65/1972 um íþróttakennaraskóla Íslands, öðlast gildi nú þegar.

Menntamálaráðuneytið, 25. apríl 1981.

Ingvar Gíslason.

Birgir Thorlacius.